

Таъзия



11:56 / 10.10.2023 1373

«Hilol Nashr» матбаа-нашриёти мажмуаси ҳамда Islom.uz портали жамоаси дин ривожига катта ҳисса қўшган, Қозоғистоннинг етук уламоларидан бўлган, Олмаотадаги Ислом университети ректори лавозимида хизмат қилган ва Халқаро Қозоқ-Араб университетида фаолият юритган устоз Абдулла Жолдасовнинг вафот этгани муносабати билан у кишининг барча оила аъзоларига, сафдошлари ва шогирдларига чуқур, самимий таъзия изҳор этади.

Аллоҳ таоло марҳумнинг барча солиҳ амалларини ўзларига ҳамроҳ айлаб, қабрларини жаннат боғчаларидан қилсин, бу дунёда қилган хайрли амалларидан, хизматларидан ҳосил бўлган ажру савоблардан Қиёматга қадар баҳраманд қилиб, руҳларини шод этсин, ҳақларига қилинадиган барча хайрли дуоларни ижобат айласин!

Марҳумнинг аҳли байтига Аллоҳ таолонинг қазои қадарини розилик ила қарши олган чинакам мўминларнинг мақомини сўраймиз, барча яқинларига гўзал сабр тилаб қоламиз.

Иннаа лиллааҳи ва иннаа илайҳи рожиъуун!

Устоз Абдулла Жолдасов ҳақида

Абдулла Жолдасов 1946 йил 19 мартда Жанубий Қозоғистоннинг Янгиовул қишлоғида дунёга келган. Шу ердаги ўрта мактабда ўқигач, 1966 йили Мир Араб мадрасасига ўқишга киради. Мадрасани тугатиб, 1971 йили ТИИга ўқишга киради. Кўп ўтмай, диний назоратнинг тавсияси билан Абдулла Жолдасов Мир Араб мадрасасига мударрис қилиб юборилади.

Ўқишини эса сиртдан давом эттириб, 1975 йилда аъло баҳоларга тамомлайди. Шу йили диний назоратнинг Қозоғистондаги вакиллиги буйруғи билан Чимкент вилояти Туркистон туманидаги «Хинвет» масжидига имом-хатиб қилиб жўнатилади. Бир йилдан сўнг Павлодар шаҳридаги «Бижан» масжидига ишга ўтказилади. Бу ерда етти йил ишлайди.

Абдулла Жолдасов 1985-1988 йилларда Урал шаҳридаги марказий масжидда имомлик қилган. 1989 йили Тошкентга қайтиб, ТИИга ишга киради. Шу билан бирга «Совет Шарқи мусулмонлари» («Мовароуннаҳр мусулмонлари») журналида масъул муҳаррир бўлиб ишлайди. 1992 йилда Абдулла Жолдасов Чимкентдаги Жанубий Қозоғистон араб тили институтига (Халқаро Қозоқ-Араб университети) ишга ўтади. Бу ерда араб тили кафедраси мудирини бўлиб ишлайди.

Абдулла Жолдасов 2000 йилда Олмаотадаги Ислон университетида ректор этиб тайинланади. Бир неча йилдан сўнг яна Халқаро Қозоқ-Араб университетида ишга қайтади (2005 й). Бу ерда 2009 йилгача ишлаб, нафақага чиққан.

Абдулла Жолдасов «40 ҳадис қозоқча сўйлайди», «Араб диалектологияси», «Қурбонлик дастурхони», «Ҳозирги араб тили», «Ислон ақидаси», «Арабча-қозоқча сўзлик» каби китобларнинг муаллифидир.